

18<sup>o</sup> mai

IN OBITUM  
ANTONII CANOVAE  
CARMEN



R O M A E  
EXCUDEBAT DE ROMANIS  
A. MDCCCXXIII.

---

---

*Facta a Praesidibus potestate.*

Ora a noi , che dopo lui siamo rimasti ,  
resta imitare il buono , anzi ottimo modo da  
lui lasciatoci in esempio ; e come merita la  
virtù sua e l'obbligo nostro, tenerne nell'ani-  
mo graziosissimo ricordo, e farne colla lingua  
sempre onoratissima memoria .

VASARI , *Vita di Raffaello* .

---

**I**ngruerat, primo qualis solet esse novembri,  
Humida nox, stellarum expers, sine lumine lunæ.  
Atque ego Janiculum, dextrâ quâ in parte propinquo  
Cum Vaticano conjungitur, atque sepulchris  
Claustra aperit pietate loci ac terrore verenda,  
Consolaturus cineres, animasque piorum,  
Vota Deum saltem si tangunt nostra, petivi.  
Tuque recens leti, Antonî Canova, trophæum,  
Amplecti cujus non fas, lacrymisque rigare,  
[Adria nam dederat te, atque Adria sustulit] ossa,  
Menti aderas tristi, cruciataque corda premebas.  
Multa quidem suberant cum relligione. Quis altor  
Adveniet cupidæ laudisque artisque juventæ?  
Quis regum et primorum opibus confertus abunde,  
Prodigus externis, ut sensimus, et sibi parcus,  
Multigenas alius feret in bona publica civis?

Non etenim tantum ille sibi post aurea sæcla  
Fingendi limo formas, artemque jubendi  
Marmora sub dio vitam quasi vivere scalpro  
Adscierat. Partem imo sui stipendia census  
Multa dedit pueris tironibus, æraque cudit:  
Adjuvit, monumenta patrum qui claraque facta  
Vindicat e latebris doctâ cum lampade, cœtum:  
Consuluit miseris, Pietate tenente locellos,

Consuluit, fuerat quorum ipse domesticus olim :  
 Quæ sibi patrarat, pars tandem plera bonorum  
 Graia complexum nostra et miracula templum  
 Extulit immensæ Triadi: et sic cesserat astris!  
 Equis laude Virum propriâ donârit ademptum?

Tu; prope qui dormis humili, Torquate, sepulchro,  
 Surge o, digne operis, meritamque adipiscere laurum:  
 Sit tuba clara tamen, cineres quæ condita propter,  
 Sit tibi et eloquium, facili cui contigit, uno  
 Cum numero, extremum suadere ex Alpe Pachinum;  
 Neutra quidem redeunda prius, quam cesset inani  
 Itala verborum pubes configere ludo.

Quod si te pereunte simul jacuere Camœnæ,  
 Sique Artes jacuere; Hujus si dextera nondum  
 Æmula Naturæ viget, ac mens credita cœlis;  
 Tu potes in tantâ jacturâ reddere vires  
 Semianimis casu ingeniis, atque addere flammæ,  
 Quidque boni bonus ille tulit sacrare monendo.

Qui mihi si fuerint victuri sæcula versus,  
 Laudarem ipse Virum, magnis qui sedulus ausis  
 Tempestate ferâ Charites deduxit amœno  
 Litore, quo latære, solum peragrarè latinum;  
 Atque inspiratam genio velut ille favillam,  
 Virtutes inter, quosque exardebat amores,  
 In sua saxa, rudem blanditus pollice cretam,  
 Fuderat, ac peperit miracula! Certa regebat  
 Læva stylum, superas hauribant lumina sphæras,

Pascebantque aures habitam per scripta sophiam ;  
 Ast ubi conciperet mens verum , ubi malleus ictum  
 Prodiderat , non pondus erant , non frigora cautes .  
 Quando et avarities , et suada superbia culpæ ,  
 Irrepsitque domum livor ; vicêre dracones  
 Ingenui citius mores , innoxia virtus ,  
 Quam foeda ille suo terebraret tergora ferro .

Hinc canerem lauro et redimitum tempora olivo ,  
 Qualem jussa PII , nostramque implere salutem ,  
 Orantem dictis , victorem Sequana vidit ,  
 Cum veterum tabulas , signa , atque volumina , bello  
 Indigno direpta , iterum gaudere quirino  
 Sidere , cognatis nec non splendoribus , egit :  
 Unde tulit puram , quâ non tremefacta Corinthus ,  
 Aut Rhodos , aut Smyrnæ , facundæ Palladis hastam  
 Principis ante pedes , nitidam retulitque coronam ,  
 Emicuitque novis titulis plaudente Senatu .

Hujus et interitus , castæ quia sæcula vitæ  
 Cessatura cluent melius , non laude careret .  
 Scilicet invisens , Phoenix velut aurea nidum ,  
 Quæ crevere Deo prope parvas inclyta cunas ,  
 Artifici ipsa rogos , templi molimina , lectum  
 Pressit amicitiae Venetûm digressus in urbem ,  
 Tabuit ac penitus laceranti viscera morbo .  
 Fessus erat : denis tria non superaddere lustra ,  
 Nec prece , nec curâ , nec jam datur arte levare ;  
 Et purgari aliquâ jam sorde , omnemque dicare



Quam bene struxit opem , patriis altaribus ardet .  
 Oh ! ait , oh halitu argillam dignate animandam  
 Contrectare , Deus ! Tua nos documenta seqûti  
 Quô licet , exiguo si quam pro munere laudem  
 Gessimus , omnem habeas , quia nos sine te nihil infra !  
 Dixerat : et domito stupuit cum pectore cælum .  
 Spiritus extremumque inter carnisque duellum  
 Candidulam , sensu et rationi prorsus adhærens ,  
 Omnipotenti animam complexa ob Funera Nati  
 Credidit , atque inter mœrentes lætus obivit .

Marmoreâ coelebs condatur corpus in urnâ .  
 Hinc super illacrymet rostrô inclinata jacenti  
 Adria , turrigeros Roma hinc effusa capillos .  
 Tres in fronte , caput velati , cetera nudi ,  
 Componant pueri sertum ferale : jacebunt  
 Sub pedibusque trium Peniclum , Regula , Scalprum .  
 Sitque brevis titulus , qualis decet : ALPHA ET OMEGA .  
 UNDIQUE VIVENTIS CANOVAI OSSIBUS ARTES .

Talia deserto volvebam in culmine . Tuque ,  
 Mens o , scribenti faveas , quæ lapsa tenebras  
 Terrificas inter ; portentaque visa recursa !  
 Nam seu nostra loquax suspiria redderet echo ,  
 Sive repressa animo struerent magis ipsa labores ,  
 Contuleritve locus peragi phantasmate sensus ,  
 Paulatim frondes trepidare ego , flabraque venti ,  
 Terrerique novâ formidine , ludier umbris !

Septigenis fletu quin respondere miserta  
 Cuncta videbantur de collibus, atque gigantis  
 In morem ab summo Capitolio et arce Quirini  
 Divite cum serto Libitina, indutaque bysso,  
 Hinc atque hinc suris consurgere denudatis,  
 Falce minansque suâ. Parce oh, mors impia, parce!  
 Magnum opus annorum et studiorum sæva bonorum  
 Fregisti! Rapias aliud? ... nihil inde supersit!

Descendo pavidus, teque, o Tyberine, saluto,  
 Rara triumphalis propter vestigia pontis,  
 Unda ubi cum flavo disternat æquore ripas.  
 Prætereo portam, et miseris concessa medendis  
 Atria: jamque Petri dubiâ sub luce columnæ  
 Grandescunt, pariterque tholus, subjectaque signa,  
 Et duo quæ tangunt salientia flumina nubes.  
 Hîc quoque nec menti nec cordi devius artis  
 Phidiacæ decor ille! Ambo de limine sancto  
 Obliti pietatis enim rugire leones  
 Adriaci, ac tumulus Clementis inire ruinam;  
 Quique ad Jorchiadum face versâ, et fronte caducâ  
 Formosi juvenes vigilant monumenta, videntur  
 Funeris in pompam movisse Auctoris; et imis  
 Ex adytis Pius ipse, ingens ab imagine saxum,  
 Tollere ad astra caput redivivum, et vota profari  
 Artifici auxiliata suo! Miraclaue tanta  
 Consiliis inopem dum me superantque trahuntque,  
 Distineor, sistôque anceps, trepidusque pererro.

Misceri populo tandem spe nitor , et , Æli  
 Mausolea petit quô semita , ducor . Ocellos  
 Læva terit : cordis metitur dextera pulsus .

Cum , latet an de nube cavâ , aut tellure profundâ ,  
 Nil mortale gerens juvenis , nisi cognita vultus  
 Ora , habitumque , nigro se in tramite candidus offert  
 Siderea cum luce micans . Huic lanea molles  
 Distringit lorica humeros ; huic cærulea gemmæ  
 Lumina fronte nitent : tenui coma pexa galero  
 Diffluit , atque genas graciles circumvenit auro .  
 Denique talis erat , qualis jam pariete vivus (\*)  
 Auscultare Platona suum belle ipse redibat  
 A speculo , flagrans testatus imagine pectus .

Ac velut , in scopulos zephиро impellente carinam ,  
 Exertum cæca tandem caligine solem  
 Prosequitur multâ prece navita ; sic mihi vultu  
 Turbida placari dum sensi pectora noto ;  
 O Raphael , decus Italiæ , quo sidere , dixi ,  
 Laberis in gemitus ? Quid fers ? Deus anne sub auras  
 Et venisse iterum , et Ternarum in sede Sororum  
 Legitimum jussit , viduumque tenere tribunal ?  
 Siste redux ! Annis juvenilibus adde senectam :  
 Salve o , Phidiacûm qui damna rependis , Apelles !

Ille , verecundo prætingens ora rubore :  
 Si dudum solvisse modum , nunc fletibus æquûm  
 Parcere . Mortales fuimus ; nec vivere compos  
 Vos infrâ Canova , premit qui lucidus axes .



At quia surrexisse iterum et vixisse probastis  
 De Tribus alterutram , dum lentior altera surgit ,  
 Quis putet interitum struxisse Sororibus umquam  
 Sævam Athropen , cui tanta mali non facta potestas ?  
 Urbibus insidunt artes , favet urbibus ipse  
 Omnipotens , meliusque quirinæ prospicit Urbi .  
 Olli certa Viri dederat vestigia nosse  
 Cum semel oblita est decoris monumenta vetusti :  
 Ast modo , non aliter , monstrato insistere gressu  
 Aut decet , aut omni jam laude carere necesse .  
 Hoc tantum monuisse velim : quod sive recentes  
 Artifices scalpro , studeantve coloribus , omne  
 Non tulerint punctum , ni , quâ ratione negatum  
 Non fuit humanæ DEITATEM attingere menti ,  
 Significare queant ; atque id decus artibus addant .  
 Laudantur culto Veneres a corpore ; nexu  
 Laudantur Charites parili ; sit mitis Apollo ;  
 Sit perbellus Amor , levis Hebe , et candida Psyche :  
 Lumina torva juvent Gradivum , casta Minervam :  
 Jupiter et pacem sibimet componat , et iram :  
 Perseus cum Theseo , cumque Hercule , semideorum  
 E numero , humanam speciem , divamque fruantur :  
 Qui sedet ast summâ arce Deus , non fabula vatum ,  
 Sit nova , sit gaudens sublimi laude venustas .  
 Grajugenûm leges quæ complectatur , et ultra .  
 Hocce magisterio [ dicam quia causa fatendi est ]  
 Plurima post operosa hominum simulacra , Deûmque ,

Ipsæ ego mutantem se nostrâ ab imagine Christum  
Extremis junxi tabulis, et funera vici.

Nec secus iste, luto Divinum a clade Cadaver  
Virginis e gremio distentum ubi, et omnia finxit  
Quot patitur tormenta Parens, quot Magdala deflet,  
Struxit opus magnum; conscendit nomen Olympum:  
Excupiitque suâ cælum virtute potiri.

Parce igitur lacrymis, vates; ac mœsta sodali  
Dum LUCÆ ampla cohors, dum Roma parentet alumno,  
Dum tumulo imponent sua signa, ac temnere fata  
Edoceant, et posse geri de morte triumphum;  
Tu mea dicta feras. Non hoc tamen excidat, oro,  
Quod Thorwalsiaden danum, Ateste, atque Phinellum,  
Celtiberosque duos, Solâdem, Alvâresiumque,  
Cumque Laborario Albacinum, et nomine Fabrum,  
Ne mea vota cadant, jubeas salvere, figurant  
Corpora qui in saxis. Dic plurima Camuccino,  
Romuleam nostro cui reclusisse palæstram  
Jure licet, Lando, Vicardôque, Agricolæque,  
Et Manno, et Puteo. His etenim [ nec fallor in aula  
Cælituum ] his longum stabunt cultoribus Artes.  
Quique, Pio florente, gerit data civica sceptrâ  
Rebus, lege prius sancitâ, PACCA, regundis,  
Non sinat ista sinu suavissima pignora carpi  
Dicta suo; foveatque magis: quia dignus habere  
Quid LEO, testis ego, quid magnus adeptus IULUS:  
Et jam sæcla ruunt.... Inquit: perque aera nigrum

Argento similes a tergore displicat alas ,  
 Illucetque micans camerato in fornice fani .  
 Ac mea quantum acies altum specularier ausit ,  
 Illi facta comes nova stella : et Castoris ardet  
 Igne velut Pollux , alterno lumine binæ  
 Instituire parem rutilumque per æthera gyrum .

PHILIPPUS DE ROMANIS .

---

(\*) *Nota ad pag. 8. vers. 11.* Nempe in parietariâ picturâ Palatii quam dicunt *Scuola d'Atene*, ubi Raphael Sanctius suam ipse imaginem affixit a speculo . Præterea notandum est quod idem Sanctius diem obiit supremum eo loci ubi nunc caput viæ *di borgo nuovo* ad plateam Vaticanæ Basilicæ : quare etc.



I M P R I M A T U R ,

Si videbitur R. P. Mag. Sac. P. Ap. Mag.

Joseph della Porta Vicesg.

---

*Nihil obstat*

D. Cajetanus Donaudi C. R.

I M P R I M A T U R .

Fr. Tomas Dominicus Piazza Ord. Præd. Mag.  
et Soc. Rev. P. Mag. Sacri Palat. Apost.